



Jovo Divjak s najbližim saradnikom Mehmedom Agićem

Podršku je dosad dobilo 57.908 mladih

Udruženje Obrazovanje gradi BiH nastavlja misiju dugu četvrt vijeka, u skladu sa svojim imenom. Cilj za 2019. je gradnja hostela kako bi olakšali život siromašnim

I u 2018. godini je Udruženje Obrazovanje gradi Bosnu i Hercegovinu bilo dio života velikog broja mladih ljudi, iz čak 38 gradova ove države.

- Jeste bila turbulentna godina, ali mi smo zadovoljni. Nastavljamo dosledno realizovati svoju misiju i ciljeve koje smo postavili još 1994. godine, kada je nas 57 održalo osnivačku skupštinu, rekao je juče izvršni direktor pomenutog udruženja, kojeg niko ne zove drugačije do čika Jovo. On je to i za vremešnije od njega.

Dakle, u godini koja samo što nije iza nas, 314 mladih iz ranjivih socijalnih grupa primilo je njihove stipendije vrijedne 316.400 KM, 65 mladih je učestvovalo u edukativnim projektima Udruženja, mladi iz Visokog, Skelana, Križevića, Orahovca, Vareša, iz sarajevske Oaze, iz fojničkog Drina, sa Odredom izviđača Neretva Konjic su ljetovali na Boračkom jezeru, 15 korisnika je

boravilo u Francuskoj, Italiji i Njemačkoj, formirali su malinjak Giro-na, ubirali, prodavali maline i tako zarađivali za stipendije. To što je smanjen broj otkupa njihovih kalendara u odnosu na prethodne godine, njih ne oshrabruje.

- Mi gradimo vjetrenjače, a ne zidove, čuli smo i juče više puta. A "mi", to su pojedinci i cijele porodice, iz BiH i izvan nje: Arslanagić, Bajramović, Bašić, Biagiarelli, Cenano- vić, Filipović, Hunt, Hadžiahmetović, Hanjalić-Beck, Jakupović, Karahmet, Kišija, Kremko, Kulašin, Lioy, Mehanović, Muharemović, Musić-Zander, Osmanović, Paciucci, Pašić, Prohić, Rayman, Rustemov, Selak, Tanović, Vojniković...

Jovo Divjak je, zahvaljujući i medijima koji ih prate, na prvo mjesto stavio Oslobođenje. Kako i ne bismo bili uz njih! Pa, do sada su stipendirali 7.046 mladih, a 57.908 njih su na neki način potpomogli.

E. K.